

21. oktober 2021

UKA2021/72

Uani qinigaaffimmi Ilulissani GUX-imik Naalackersuisut peqquneqarnissaannik siunnersuut.
(Inatsisartunut ilaasorta, Nivi Olsen, Demokraatit)

Siunnersuuteqartoq Nivi Olsen, Demokraatit qutsavigaarput pingaarutilimmik aaliangiiffigissamik qaqitsimmat.

Siunnersuummik taamaattumik qaqitsinera tupiginngilarput tassami avannaani inuusuttorpassuit minnerunngitsumik angutit ilinniarsimanngitsut amerlasoorujussuupput.

Avannaata Kommuniani Ilulissani Perorsaanermik Ilinniarfimmik peqarpoq, avannaanili inuusuttorpassuit ilinniarsimanngitsut tamarmik Perorsaanermik Ilinniarfimmi ilinnialersinnaangillat taakkualu ilarpassui Aasiannut GUX-riarnissartik aamma tunuarsimaarfigisarpaat, taamaattumik Siumumiik maluginiarparput Ilulissani angajoqqaat GUX-eqalernissamik arlaleriarlutik tusagassiuutit aqutigalugit oqariartuuteqartarnikuusut.

Naalackersuisooqatigiit siuliisa arlaleriarlugu oqaatigisarpaat, kommunerujussuit tamarmik Campusimik peqalernissaat sulissutigineqassasoq siunertaralugu inuusuttut kommunerisartik qimangikkaluarlugu ilinniarfinnut ingerlaqqissinnaanissaat. Taamaattumik Ilulissani GUX-imik pilersitsinissamik siunnersuut Siumumiik tamakkiisumik tapersorsorparput. Taamaattoq maluginiarparput Naalackersuisup siunnersuut ilalernartinngikkaa, tunngavilersuutigalugu ernummatigigamiuk Aasianni GUX-imi ilinnialertartut ikilinissat aammalu ilinniarfiup matunissaa, tunngavilersuutinut aamma ilaavoq ilinniartunut inissiat amigarneri aningaasallu tigoriaannaat amigaataammata.

Siumut sinnerlugu siunnersuutima ippassaq oqaluuserineqarnerani partiinit tamanit ataatsimiititaliamut ingerlateqqinneqarpoq naaperiaanissaq siunertaralugu, tassani ersersinneqarpoq inerisaaqqinnissaq pisariaqartinneqartoq aamma oqaatigineqarpoq Ilulissani GUX-issaq aallaqqaammut aningaasarpassuarnik naleqartariaqanngitsoq aammalu ilinnialersussat amerlanngitsut aallarniutaasinnaasut Aasiannilu GUX-imut akornusiinngitsumik sammiviliisoqarsinnaasooq soorlu takornariaqarnermut tunngasinnaavoq, aalisarnermut sammiveqarsinnaavoq, timersornermut sammisinnaavoq, silap pissusaanut, pinngortitamik atuilluarnermut nunaqavissunik peqateqarluni ilinniartitsinermit pisuussutitsinnillu naleqarnerulersitsinermit, piujuaannartitsinissamut kultoorittalu aningaasarsiutitut inuussutissarsiutaasinnaaneranik tunngavilimmik sammiveqarsinnaalluni.



Siumumiik taamatut oqaaseqarluta siunnersuut ataatsimiititaliamut ingerlateqqipparput innersuussutigissavarpullu una imm. 72 aammalu imm. 95 isumaliuutissiissutikkut ataatsimoortillugit suliarineqassasut.

Doris J. Jensen, Siumut